

n'auoit deuant les yeux que des morts, des malades, des spectacles d'horreur, & parmy tout cela n'a pas manqué d'vn poinct aux deuoirs de Chrestien, iufques à se dérober les Feftes & les Dimanches, pour à l'infceu de fes plus proches, qui la perfecutoient & vouloient l'empescher de professer la Foy, se trouuer à temps à la Messe, & là faire fes deuotions avec autant de paix que si elle eust esté hors l'orage & à l'abry de ces tempestes. *Verè talium est regnum Dei:* elle fut nommée Anne en son baptesme. C'est vn esprit simple, m'escrit le Pere de Brebeuf, d'vn naturel fort doux & benin: il semble qu'elle a tousiours vescu dans vne grande innocence, horsmis les superstitions en l'obseruance desquelles elle a esté nourrie. Ayant entendu parler de Dieu, elle fut incontinent éprise de [94] son amour, & du desir de croire en luy & de le seruir. Elle ne demande iamais rien, & quand elle a quelque chose elle nous en fait part, & ne veut receuoir de nous aucune recompense (c'est peut-estre l'vnique en son espece) elle apprehende fort le peché, & dans le doute elle vient demander conseil. Elle se confesse des moindres choses, & ce incontînēt qu'elle les a commis, sans dilayer. Vn iour luy ayant dit qu'elle ne mangeast point de chair humaine: Comment, dit-elle, en mangerois-je? pendant tout le Carefme ie me suis abstenu de toute viande & festins, quoy que nous [*sc.* vous] m'eussiez permis d'y assister & d'en manger. Auparauant que d'estre baptisée elle auoit de continuels vertiges, & chaque année, enuiron l'Automne, elle faisoit faire des chansons & des danfes pour sa guerison: mais depuis son baptesme elle n'a plus esté tourmentée de ce mal: & c'est ce qu'elle va racontant à tout le monde, aussi